

ILUARSIISSUT

Siunnersuummut 6. maaji 2019-meersoq taarserpaa
(Siunnersuuteqartut aqqi iluarsineqarput)

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq saqqummiupparput:

Qitiusumik kiassaateqarfinnik kissarsuuteqarfinnillu Namminersorlutik Oqartussanit toqqaannangitsumik toqqaannartumilluunniit pigineqartunik atuisinnaanerup Nukissiorfinnut kingusinnerpaamik 1. januar 2020-mi tunniunneqarnissaanik qulakkeerinneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Atuisinnaanerup nuunneqarnera ilutigalugu kiassaateqarfinni aningaasat uninngasuutit Nukissiorfinnut nuunneqassapput. Atuisinnaanerup nuunneqarnerani atortulersuutit aserfallatsaalineqarnissaannut pisussaaffiit atuuttut allanngortinneqassanngillat atortulersuutillu piumasaqaatit Naalakkersuisunit aalajangersarneqartut naapertorlugit aserfallatsaalineqartussaassapput.

(Inatsisartunut ilaasortat Anders Olsen, Pele Broberg, Nikkulaat Jeremiassen, Peter Olsen aamma Justus Hansen).

Tunngavilersuut

Namminersorlutik Oqartussat kiassaateqarfiisa ingerlanneqarnerisa akisussaaffiginerisalu Nukissiorfiit ataanni katersorneqarnissaat amerlanerussuteqartunit Inatsisartut ataatsimiinnerini arlalinni tapersersorneqartoq Sanaartornermut Ataatsimiititaliamit paasineqarpoq. Taamaattumillu timitaliisoqarnissaa Sanaartornermut Ataatsimiititaliamit isumaqatigiittumit kissaatigineqarpoq.

UPA 2016/053-imut atatillugu suliaqarnermi Inatsisartut aalajangiippat Naalakkersuisut nassuiaasiussasut, tassanilu allaaserineqassasoq kiassarnermut immikkut uuttuusersuineq qanoq ingerlanneqarsinnaanersoq, maannamummi ataatsimoortumik akiligassiisoqartarmat, allaaserineqassappullu maanna ineqarfinni atuuttuni immikkut uuttuusersuineri teknikikkut unammiligassanut aqqiissutissat.

Kiisalu nassuiaammi ilaatinneqassaaq nunami qitiusumik kissarsuuteqarfiit kiassaateqarfiillu INI A/S-imit, Namminersorlutik Oqartussat ineqarfiutaasa immikkoortortaanit, Mittarfeqarfinnit il.il. Nukissiorfinnut qaqugu nuunneqarnissaat pillugu piffissalersuinermik.

Sanaartornermut Ataatsimiititaliap eqqumiigalugu maluginiarpaa, qitiusumik kissarsuuteqarfiit kiassaateqarfiillu qaqugu tunniunneqarnissaat pillugu piffissalersuineq nassuiaammi saqqummiunneqartumi suliarineqarsimanngitsoq.

Atortussalli tiguneqartut misissornerinut atatillugu ataatsimiititaliap maluginiarpaa, nalunaarusiat tunuliaqutaasut malillugit Namminersorlutik Oqartussat suliffeqarfiinit immikkoortortaniillu piginnittuunerup Nukissiorfinnut tunniunneqarsinnaanera piffissap sivikikannersup ingerlanerani periarfissaasoq. Ingerlatsinerup pitsaanerpaaffissaa anguniarlugu piffissamik atuinissaq aamma naatsorsuutigineqartariaqarpoq. Ingerlatsineq pitsaanerpaanngortinniarneqarmat soorunami Sanaartornermut Ataatsimiititaliamut nuannaarutissaavoq, ilanngunneqassaarlu aallaqqaammulli qitiusumik kiassaateqarfiit ataatsimut katersornissaannik pingaartitsinissaq Sanaartornermut Ataatsimiititaliap kissaatigisimamma.

Taamaalillunilu ataatsimiititaliaq atortussat atuarluareerlugit naliliivoq piginnittuunerup allanngortinnissaanut naalakkersuinikkut pisariaqartumik tapersiisoqarneratigut naatsorsuutit ukiuata tulluup aallartinnerani tunniussisoqarsinnaasoq.

Taasissutissatut qulequttami Sanaartornermut Ataatsimiititaliamit allanneqarpoq "...qitiusumik kiassaateqarfinnut kissarsuuteqarfinnullu ... toqqaannangitsumik toqqaannartumilluunniit pigineqartunut", tassanilu isumagineqarput kissarsuuteqarfiit Nukissiorfinnit toqqaannartumik pigineqartut, kisiannili aamma kissarsuuteqarfiit assersuutigalugu maanakkut ineqarfiit immikkoortortannut, immikkoortortarisimasaannut, illuutitut GTO-mit pigineqarsimasunut, atuarfinnut, Mittarfeqarfinnut kiisalu INI A/S-imut il.il. atasuusut pineqarlutik. Pingaarnersooq tassaavoq qitiusumik kiassaateqarfiit katersorneqarnissaat, taamaalillunilu annertuumik ingerlatsinermi iluaqutit anguneqarsinnaassallutik.

Pisortanut aningaasatigut allaffissornikkullu kingunerisassai

Kiassaateqarfiit tamarmik Namminersorlutik Oqartussanit suli pigineqassapput. Ingerlatsineq aserfallatsaaliinerlu aammalu taakkununga tunngasumik aningaasartuutit immikkoortoqarfinnit Nukissiorfiit ataannut ataatsimoortinneqassapput. Tamanna aamma atuuppoq qitiusumik kiassaateqarfiit nutarterneqartussat eqqarsaatigalugit, tamannami ingerlanneqartussaammat qitiusumik kiassaateqarfiit Nukissiorfinnut nuunneqarpata nuunneqanngippataluunniit. Tamatumani

nutarterinissap Nukissiorfinnit ingerlanneqarnissaa pitsaaqutaassaaq, tamannami taassuma pingaarnertut piginnaasaqarfigimmagu. Taamaattumillu nuussinerpiaq eqqarsaatigalugu allaffissornikkut atuiffiunerunissaa naatsorsuutigineqarpoq. Qanoq atuitigisoqarnissaanut apeqqaassaaq nuussinissaq qanoq aaqqissuunneqarnersoq. Tassunga atatillugu pineqartut tassaassapput ataasiartumik aningaasartuutit.

Nuussinermi immikkoortoqarfinni ingerlatsinermit aserfallatsaaliinermullu aningaasartuutit atorunnaassapput aammalu nukimmik atuinermut Nukissiorfimmut akiliuteqarnermik taarserneqassallutik. Kiassaateqarfinnik ingerlatsineq aserfallatsaaliinerlu Nukissiorfiit immikkut piginnaaneqarfigimmassuk siusinnerusumut sanilliullugu aningaasartuuteqarfiunnginnerusumik tassani isumagineqarsinnaavoq. Annertuumik ingerlatsinermi iluaqutit anguneqarsinnaassasut naatsorsuutigineqarpoq.

Nukissiorfiit piginnaasaannik aammalu annertuumik ingerlatsinermi iluaqutit atorneqarnerisigut sipaarutissat annertussasut naatsorsuutigineqarpoq. Siunnersuut ataatsimut isigalugu inuiaqatigiinnut pitsaasumik sunniuteqartussatut naatsorsuutigineqarpoq.

Namminersortunut aningaasatigut allaffissornikkullu kingunerisassai

Nalunaarusiat saqqummiunneqartut naapertorlugit sipaarutaasinnaasut annertussapput, piffissarlu ungasinnerusooq eqqarsaatigalugu kiassarnermut aningaasartuutini annertuumik sipaaruteqarnissamik siunnersuut kinguneqassaaq kiisalu kiassarnermik pilersuinermi atortuutit atuuttut siunissamilu atorneqartussat pitsaanerusumik atorneqarsinnaassallutik.

Innuttaasunut aningaasatigut allaffissornikkullu kingunerisassai

Inoqutigiiit arlaqarnerusut kiassarnermut tunngasut akisussaaffillu ataatsimut katersorneqariarpata kiassaateqarfinnut atalersinnaanerit naatsorsuutigineqarpoq, annertusaanissamullu periarfissat pitsaanerulissallutik. Taamaalilluni annikitsukkaamik ingerlatsinermi equngassutit pinngitsoortinneqarsinnaassapput, uatsinnullu atugassarititaasut eqqarsaatigalugit aningaasatigut pitsaanerusumik atugassaqaarnissaq naatsorsuutigineqarsinnaalluni. Kiassaateqarfinnit imeq atorlugu kiassaanermut amerlanernik aningaasalersuisoqarpat tamanna aamma avatangiisinut iluaqutaassaaq.

Taakku saniatigut sanaartornermut atatillugu killilimmik suliffinnik amerlanernik pilersitsinissaq naatsorsuutigineqarpoq, kiassarnerlu akikinnerulerpat nunatsinni atuisut aningaasaqarnikkut pitsaanermik atugassaqaalissapput.